

## Comentar de pruma

### Le ladin é n lingaz!

de Iaco Rigo

Chësc n'é nia da mëte en discusciun, zënza messunse bazilé de duc i valurs y prinzijs. Che les esternaziuns dl direttur dl Istitut Ladin Micurà de Rù, é gnüdes portades cun La Usc di Ladins, scrites por talian y por todësch, inçe foradecà pro jënt, ufizi, scores, universitàs, ez., podess cherié n gran dann. Püch de fat él, sce al vëgn dit ségn, che les osservaziuns é gnüdes da tröc straintenüdes y strumentalisades. Scripta manent y dà corda. I ladins à messü combate secui alalungia por che so "lingaz dla uma" gniss reconesciü n lingaz y inçe en pert sconé.

Le ladin é n valur, na usc dal cör y tesur de parores che po descri döt, dal cör al laür. Laurè cun le lingaz ladin messass avëi da fà pordërt cun le cör. Zënza amur él da se fà ert.

### ***„Il ladino, cioè una lingua ladina, non esiste”***

La Union di Ladins de Gherdëina ie a di puech tumeda dala nibles y ie indinieda canche la à liet la frasa, che repurton tlo tltitul, scritta da Leander Moroder, direttëur dl Istitut Ladin “Micurà de Rù” te si sfuei Est Ovest Aurora, che dëssa vester la prejentazion de n proiet n con’ dla lijëndes ladines y partì ora dan da puech cun n numer dla Usc di Ladins. Chësc sfuei ie unì dat ora deberieda ala “Società Dante Alighieri”, na associazion - cun chëla che l Istitut Ladin à bele abù d’altra cunlauraziuns ti ani passei – che à fins nazionalistics y che se bat per... “Il mondo in italiano”, coche l ie da liejer te si motto.

Cun chësta afermazion lughenea, neghea, ne recunësc Leander Moroder nia lejistënza de n lingaz ladin. Sce per él ne n’iel nia n lingaz ladin, ne n’iel nia dëni de reprejenté na istituzion culturela coche l Istitut Ladin “Micurà de Rù”! À pu propi l preve badiot Micurà de Rù (Nikolaus Bacher), studiëus de nosta rujeneda ladina dolomitana, scrit coche prim tl ann 1833 na gramatica ladina dal titul “Versuch einer deutsch-ladinischen Sprachlehre.” L’idea de basa de chëst’opra fova l’elaurazion de n lingaz de scrittura unificà per duc i ladins y propi

va inant a plata 4

## „Il ladino, cioè una lingua ladina, non esiste”

va inant da la pruma plata

per lecurdè y uneré Micurà de Rù ie l Istitut culturel ladin a San Martin de Tor, fundà tl ann 1976, unì numinà do a d'el. A vester che: a) un di fins primeres de dui trèi i istituc culturei ladins dla cin' valedes ladines ntèur al Sela ie chël dl mantenimènt, dla cura y dl svilup dl lingaz ladin, b) l ladin ie recunesciù coche lingaz ufiziel sibe dala Provinzies autonomes de Trènt y Bulsan che dal Stat talian, se damandons al plu tert a chësc pont coche n diretèur, che fej dut auter che ti jì do al fin fundamentel per chëla ncèria istituzionela che l cuer, possa mo tenì na tel' stiera culturalmènter tan mpurtanta per duta la Ladinia. Se damandon che

l assessèur per la cultura ladina tole al plu prësc pruvedimènc a scunanza de nosc lingaz ladin y contra la minonga dl diretèur dl Istitut (Ladin?) "Micurà de Rù", ajache de tel' esternazions ie coche n stlaf tla musa a duta la istituzions cultureles che se dà ju cun la cossa ladina y nia mé a chëles che lëura a nivel de ulentariat. Sëuraprò mëteles nchinamei a dubité sce l ie bën iustificà l'ejistënza dl Istitut nstës ma nce chëla, per ejèmpl, dla repartizion ladina dla sciences dla formazion dl'università de Persenon y dl assessorat ala cultura ladina dla provinzia de Bulsan.

*Per la Union di Ladins de  
Gherdëina,  
l presidènt Stefan Kasslatter*